

## Pitbull u dackel?

DA CLAUDIA CADRUVI / ANR

**I**sto capitar l'emprim insatge, Uschiglio na voteschan politichers betg per mesiras severas puncto chauns privlus. Quai è la conclusiun ch'ins po trair suenter la debatta d'ier en il cussegl grond. Ils deputads han decidì ier a Cuira che chauns che dattan en egl han d'absolver in test. Ma reglas pli severas pertutgant chauns privlus, sco Luca Tenchio (pcd/Cuira) ha proponì, ha il parlament refusà cun 76 cunter 20 vuschs. Tenchio ha pretendì ina lubientscha per chauns privlus.

**P**er part han ins bunamain fatg ridicul il deputà pervi da sia proposta. Igl è vegnì ditg che la glied da la citad na haja ozendi nagina relaziun normala pli tar ils animals. Igl è vegnì ditg che betg mo ils pitbulls sajan privlus, mabain ch'er in dackel possa morder, i dependia be co ch'il chaun vegnia tratg. Ed igl è vegnì ditg ch'era chauns che pertgiran muntaneras sajan privlus, ma tar lezs chauns sajan ins led, sch'els sajan aggressivs.

**M**a l'agressivitat d'in chaun che pertgira nursas ha in niz per la carstgaunadad. L'agressivitat d'in pitbull betg. E pertutgant la glied temelitga da la citad: La schanza d'inscuntrar in chaun privlus en la citad è pli gronda che d'inscuntrar in luf u in urs sin la champagna. U ha insatgi gia ina giada inscuntrà in luf u in urs en in auto da posta en Surselva u l'Engiadina.

**I**ls deputads han probabel era refusà prescripziuns pli severas, perquai ch'i dat en il Grischun betg tants chauns da rassas che valan sco aggressivas. Lain pia sperar che quai restia era vinavant uschia. E lain era sperar ch'i na capitia qua betg accidents sco quel dad Oberglatt avant dus onns. Pertge uschiglio votass il cussegl grond tuttenina gist il cuntrari, numnadamain cun 76 cunter 20 vuschs per scumonds da chauns privlus.